

# 2 Corintios

---

**Pablo ishim Porrosht aabo ör saludo.**

**1** <sup>1</sup>Yok Pablo. Porrosht chiihla yok shuu tomsaha par Jesucristo ir apóstol. Eyok leshibich Timoteo de pahir. Oyichew ana hutita par oyosim erze Porrosht aabo uje otakisho lawichihí wahacha dit Corinto uje dechi hnimich Acaya hn par nos wir Porrosht aabo yewo uje ode lekitiyo wahacha hnimich Acaya. <sup>2</sup>Sehe tuu eyok Deych Porrosht hn eyok Irhích Jesucristo odosir olak hn oduhu olak aho kiis.

**Oso oloter Pablo shi pork sanimirāha Porrosht ahwoso.**

<sup>3</sup>Titim olak uje oyeeychāha Porrosht uu eyok Irhích Jesucristo ir Deych. Ir Deych wichi uje chuuna uje oso ör losuhlaabo hn takashim ör hn shuu ör aho kiis. <sup>4</sup>Uje nos wir kuche mihnūwo tīr öryok ich Porrosht shuu öryok aho kiis par uje öryok pwele oyuhu wir ör aho kiis toy erze uje kuche mihnūwo tīr ör. Heke öryok pwele oyuhu ör aho kiis shi itso uje Porrosht shuu öryok aho kiis. <sup>5</sup>Uje kuche mihnūwo kihniya tīr öryok shi itso uje tīr Cristoni ich Cristo shuu öryok aho kiis pork ye oyotiis irpe. <sup>6</sup>Uje kuche mihnūwo tīr öryok ich shi tīr öryok pork oyanimirāha Porrosht ahwoso oyitim olak, heke oyuhu amsahalo par ir aabo hn oyuhu olak aho kiis. Uje Porrosht shuu öryok aho kiis ich shuu olak aho kiis toy par uje olak ewenta erze kuche mihnūwo uje tīr olak shi itso uje tīr öryok. <sup>7</sup>Oyiraha uje erze kuche mihnūwo sehe duhu moymlo Cristo per ye moymlope pork oyiraha uje erze kuche mihnūwo uje tīr olak wir shish tīr öryok toy heke Porrosht tyenij shuu olak aho kiis shi itso uje shuu öryok aho kiis. <sup>8</sup>Pishibo watsaklo, tahmūr uje erahalo erze kuche mihnūwo uje tīr oryökni uje öryok dechi hnimich Asia. Erze kuche mihnūwo uje oshiyokorīhi öryok ich dospa nehech ye öryok pwele öryok ewentpe. Shuu öryok eyuwo tisir uje tyenij oyiti. <sup>9</sup>Oyuuna shi itso uje jwe tatim öryok par uje shuu oshuu öryok oshuu oyiti. Erze mihnūwo tīr öryok par uje oyiraha uje ye öryok ukürbirsh par uje oyitokolihí erze kuche mihnūwo. Shi tyenij oiyiem Porrosht par uje wichi takashim öryok pork wichi ir ukurbo de. Wichi uje shuu topo ör ikpo. <sup>10</sup>Porrosht chiyuhu

oryokĩhi erze uje ich mihñũwo pisho uje sehe duhu òryok duhu oyitini, heke oyiraha uje wichi tyenij chiyuhu oryokĩhi erze kuche mihñũwo uje tĩr òryok toy nehe. <sup>11</sup> Olak tyenij olak orar apurlo Porrosht par uje takashim òryok. Heke okihniya tyenij onina Porrosht nehe uje takashim òryok pork olak orar toy itso òr uje òr orar otsapur Porrosht par òryok.

### Pablo ye tĩr dít Corintope.

<sup>12</sup> Sehe titim olak uje òryok aho kiis pork ye oyiyokòr mihñuwòho osope, hn yelij oyehnyèr olak. Shi oyiyokòr uje Porrosht sahmùr. Ye òryok aho yùhirshpe uje oyakashim olak hn ye shi tãra òryok eyuwope ilo uu ìrmo oso uje otsakit yewo. Porrosht wichi uje takashim òryok. <sup>13</sup> Nos wir hute uje oyichew hn oyosim olak wir par uje olak ler hn erahalo uje tata. Sehe tuu nos eraharpa uje titim olak <sup>14</sup> pork olak yèrij erahalo. Heke uje eyok ìrhĩch Jesús cheeshpo nehe ich olak ayipa hn ahmùrlo uje oyitim olakni itso uje òryok ayipa uje olak dechi eyok ìrhĩch Jesús ahir toy. <sup>15</sup> Tikiraha uje ahmùrlo yok itsorz heke sehe takaha tekirihi olak tuu do bese. <sup>16</sup> Tuu peyuyo tisĩr uje sehe tekirihi olak wap uje takaha titĩr hnimich Macedonia hn sehe titĩr olakpo uje tikitokolihĩ Macedonia. Uje tikitokolihĩ olak ahir nehe ich sehe tuu akashimlo yok uje titĩr hnimich Judea. <sup>17</sup> ¿Je yok kushiyak uje sehe tiyokòr tuu ilorz? ¿Je olak eyuwo tisĩr uje yok itso erze ìrmo oso uje otata otsii: —Èhe— per ye oniyokòrpe uje otata? <sup>18</sup> Ich ùru uje Porrosht shish shuu lahwoyo yakaha hn ich ùru toy uje erze ahwoyo uje oyitim olak ye oyuhu ilorzpe: —Èhe— hn oyehnyèr olak. <sup>19</sup> Yok hn Silvano hn Timoteo oyitim olak Jesucristo uu Porrosht Ijit. Oyitim olak uje ich ùru heke tyenij yakaha. Ye oyehnyèr olakpe. Shish yakaha uje Jesús tata. <sup>20</sup> Nos wir ahwoyo uje Porrosht chibitkite ich Jesús shuu yakaha. Heke ich oyahmùr uje Cristo shiyokòr hn oyiita uje yehe wichi. Uje oyiita oyuhu itsorz ich oyuhu Porrosht ich dich. <sup>21</sup> Porrosht wichi uje takashim òryok hn takashim olak par uje ma ye yotiislo Cristo. Porrosht wichi uje chiihla òryok par uje oyiyokòr ir ibiyo. <sup>22</sup> Wichi chibite eyok yarta pork wichi uu eyok yinsirc. Ir yarta wichi uu ir Ichibich uje chibite eyok aho, heke ich ùru uje eyok owich de Porrosht ahir.

<sup>23</sup> Porrosht chiraha uje ye titĩr olakihĩ wahacha Corinto petikni shi pork ye tahmùrpe uje tyenij titim olak pahwoyo uje ich ihne. <sup>24</sup> Ye oyirok olakpe oyuhu ye otiislo Cristo. Shi sehe oyakashim olak oyuhu olak ma ayla hn ye olak koswãha eyok ìrhĩch.

**2** <sup>1</sup> Tibite uje tekirihi olakpo ich ye tahmùrpe uje tuu olak dosdarak. <sup>2</sup> Kimiji tuu olak dosdarak ¿ich yeniipo uje oshuu yok ayla? Shi olak per kimiji tuu olak dosdarak ich ye olak pwele uje uhulo yok ayla. <sup>3</sup> Heke tichew asa hutitani hn tokosim olak par uje tekirihi olak nehe hn ye uhulo yok dosdarak pork shi olak uje uhulo yok ayla heke ich nos olak ayla shi olak itso yok. <sup>4</sup> Uje tichew asa hutitani hn tokosim olak ich

yok dosdarakpa. Tukuuna nehech tikiyerh pork ye tahmūr petikni uje tichew titim olak par uje tuu olak dosdarak. Tichew asa hutita par uje tuu erahalo uje ich tahmūr pishi olak.

**Tyenij ör perdonar ese hnakirbich uje shiyokör mihnikni.**

<sup>5</sup>Titim olak. Kimiji yeék duhu yewo ör dosdarakni ich shuu yok dosdarak, hn nos wir olak toy. <sup>6</sup>Olak kihniya uje eyuhulo ese hnakirbich iglesya eheth pork shiyokör uje ich mihnikni. Ele ahle ich iim erze mihnuwo heke uhulo olak aho kiisihirpo. <sup>7</sup>Ele ahle ich tyenij olak perdonar hn akashimlo ire par uje ye wichi dosdarakpa. <sup>8</sup>Heke titim olak par uje uhulo imeheeych uje ahmürlo ire. <sup>9</sup>Heke tichew asa hutitani hn tokosim olak par uje tikiraha kimiji nos ahakörlo uje titim olak. <sup>10</sup>Uje olak perdonar yeék ich yok perdonar ire toy. Kimiji yok perdonar yeékni ich yok perdonar ire hn Cristo chiraha uje ich ürü uje yok perdonar wichi par uje tuu olak aho kiis. <sup>11</sup>Yok perdonar ire par uje ye Satanás derz eyok yeék. Nos yiraha wir kuche uje Satanás shiyokör pork sehe nehnyer eyok.

**Uje Pablo taachihir diti Troas ich ye eheth kiispe.**

<sup>12</sup>Sehe titim olak. Uje takaachihir ese diti Troasni ich tanimiraha Porrosht ahwoso titim ör uje Cristo ishi ör hnitewihir Porrosht ahirkite. Eyok Irhich takashim yok heke ich okihniya uje sehe otër ir ahwoso <sup>13</sup>per ye pehet kiispe pork ye tish pishibich Titope. Heke tokoyim uje takit ör hn titim ör uje ich takaha hn titir hnimich Macedonia.

**Cristo ir ahwoso ich itso aat ehmuuj.**

<sup>14</sup>Titim olak uje ich tikinship Porrosht pork shish shuu Cristo serz Satanás hn eyok yukwiya Cristo. Porrosht ishim eyok par uje yanimiraha ir ahwoso yitim erze oso uje ode lekityo uje Cristo ishi ör hnitewihir Porrosht ahir. Erze ahwoso ich shi itso uje aat tokole chish lekityo. <sup>15</sup>Par Porrosht ich erze ahwoso uje yitim ör Cristo ich shi itso aat ehmuuj. Erze uje sehe omasaha par Porrosht aabo hn erze uje omasahani ochunt ese aat. Erze uje otir urhuta bahluta eheth nehe ochunt toy. <sup>16</sup>Par erze uje otir urhuta bahluta eheth nehe ese aat ich shi itso topo ör aat, per par erze uje ör ikirit de Porrosht ahir ese aat ich aat ehmuuj. ¿Yeék pwele shiyokör erze obiyo par otatim ör Cristo? Shi ese uje Porrosht takashim ire. <sup>17</sup>Öryok uje oyanimiraha Porrosht ahwoso ich ye öryok ilo erze yewope uje otsanimiraha shi par uje otserz hnote. Porrosht ishim öryok erze obiyo par uje oyanimiraha ir ahwoso. Ich ye öryok aho yührshpe. Oyitim ör Cristo Porrosht ile ikich.

**Porrosht chibite lahwoso ahlo.**

**3** <sup>1</sup>Uje oyitim olak öryok ibiyo oyuhu itsorzike ¿je yesh öryok narim oryök? Ye öryok narim oryökpe. Ye nesitpe uje oyosim olak hutita

uje tata yeniipo òryok hn òryok ibiyo latikpo uje oyiyokòr shi itso uje yewo oshim olak. Ye nesitpe oyapur olak par uje atsilo asa hutita uje tata yeniipo òryok par uje oyosim yewo. <sup>2</sup>Olak iluu ich ahle pork amsahaloni par uje olak Porrosht aabo. Erze olak iluu ahle ich shi itso hutita uje tata yeniipo òryok pork olak iluu ahle chibite orhòta yeniipo òryok. Nos ochiraha olak uje olak iluu kinèhe. <sup>3</sup>Ich imeheeych uje ye otiislo Cristope. Erze olak iluu uje ich ahle ich shi itso hutita uje Cristo chichew hn ishim òryok par uje nos ochiraha yeniipo òryok. Wichì ye dichew dibite hutitape. Porrosht wichì ika hn chibite Dechibich olak aho shi itso uje chichew hn chibite olak aho. Ye dichew dibite duhu ilo uje chichew chibite ese kojach uje ishim Moiseskite.

<sup>4</sup>Oyiraha uje Porrosht chihla òryok par oyiyokòr ir ibiyo pork Cristo takashim òryok. <sup>5</sup>Ye oryòkpe uje oyuhu olak iluu ahle par uje òryok narim òryok. Shi Porrosht wichì uje takashim òryok par uje shuu olak iluu ahle. <sup>6</sup>Wichì takashim òryok par uje oyanimiràha ir ahwoso ahlo uje chibitni. Wir ye ilo asa ir ley uje chichewkite chibite kojano po per chibite Dechibich olak aho shi itso uje chichew chibite olak aho. Asa ir ley shuu imeheeych uje oso oshiyokòr uje ich mihnuwo heke tyenij shuu otoy per ir Ichibich ishim olak ikirìt uje yelij nihna ire.

<sup>7</sup>Uje Porrosht chichew asa leykite chibite erze kojano po hn ishim Moisés par erze israel oso ich shuu Moisés ile hüre heke ye wir òr pwele uje oteychim Moisespe pork ich ir ile hürpa shuu òr ile pata, per shi sihna ire saraashi nehech ye ir ile hürpe. <sup>8</sup>Ich ma ihërtpa ese Porrosht Ichibich ir ibiyo ahlo je uje ishim Moiseskite. <sup>9</sup>Ich om uje chibite erze ley uje shuu oso otoy per ich ma om ese uje shuu òr ikirìt de uje yelij nihna ire. <sup>10</sup>Asa ley waa je Porrosht ishim Moiseskite ich om per Cristo ir ahwoso ich ma om heke shuu asa ley tokole shi itso uje ye latikish. <sup>11</sup>Uje Moisés tòhwa erze ley ich ir ile hürpa per shi daalo arhaabo hn erze uje hüre ich sihna irpo, per uje Porrosht shuu Dechibich masaha eyok aho ich ma om pork shish eyok ikirìt de Porrosht ahir. <sup>12</sup>Yirahalo uje eyok ikirìt shish de Porrosht ahir heke ye yitilape uje yanimiràha ir ahwoso. <sup>13</sup>Eyok ibiyo shish bale. Ye yakislope uje yiyokòrlo yuhu eyok ilo Moisés uje shiyeru delekite chira shekipit par uje ye erze israel oso oteychim ile uje ich hürpa nehech sihna irehe ile. <sup>14</sup>Òr ire ye onahmürpe uje otër Moisés par uje ochiraha. Ele ahle ich shish israel oso òr itsye. Uje òr ler Porrosht ahwoso ich ye odirehepe uje tata. Shi itso ese shekipit uje Moisés shiyeru delekite wichì sentii òr ile, heke ye odirehepe. Ye òr pwele odirehepe per uje ye olotiis Cristo ich ochiraha. Wichì shi itso uje chiyuhu ese shekipit uje sentii òr ile. <sup>15</sup>Nehech ele ahle uje òr ler erze hute uje Moisés chichewkite ich shi itso uje ese shekipit shiyeru òr ile par uje ye odirehepe. <sup>16</sup>Per uje yeëk ye lotiis eyok Irhich ich shi itso uje chiyuhu ese shekipit uje sentii ir ile. <sup>17</sup>Eyok Irhich wichì shi ichibich heke kimiji eyok

İrhîch ir İchibich chihî yeëk eheth ich ye erze ley uje Moisés chichewkite tibey irpe. <sup>18</sup>Nos wir eyok uje eyok Porrosht aabo ich ye ese uje itso shekipit nentii eyok İlepe. Eyok shî eyok itso pejta uje shuu oso oteychim Cristo ir İluu. Uje yeëk teychim eyok İluu ich chıraha eyok İrhîch ir İluu pork eyok İluu İler tokole saraãshi ire hn ele ahle masaha uje ich shî itso Cristo ir İluu. Eyok İrhîch wichi uje shuu eyok İluu kinêhe pork wichi shî ichibich.

**4** <sup>1</sup>Heke titim olak uje Porrosht sosir ôryok hn İshim ôryok erze obiyo par uje oyanimirãha ir ahwosni shî pork sahmür İshim ôryok. Ye oyuhu patim oryôkpe uje oyiyokör ir İbiyo. <sup>2</sup>Oyibite par uje ye oyiyokör erze mİhnüwo uje oso oshiyokör uje shuu oso opook hn otsakis, hn oyibite par uje ye oyehnyêr yeëk hn ye oyuhu Porrosht ahwoso poshikpe. Uje oyiyokorãha ör ich shî oyiyokorãha ör uje ich üru hn oyuhu İmeheeych. Heke erze uje otêr ochıraha uje shî oyiita uje ich üru Porrosht İle İkich. <sup>3</sup>Oyanimirãha Porrosht ahwoso oyitim ör uje Cristo İshî ör hnitewihî Porrosht ahirkite. Kimiji ye İmeheeychpe ich shî par erze uje otır urhuta bahluta eheth nehe. <sup>4</sup>Satanás wichi uu İrmo oso ör porrosht. Wichi ye duhu ör eyuwo dishpe heke otsotiis Cristo. Ye duhu odıraha uje Cristo İshî ör hnitewihî Porrosht ahirkite. Cristo wichi itsship ir Deych. <sup>5</sup>Uje oyanimirãha Porrosht ahwoso ich ye ôryok narim oryôkpe. Shî oyanimirãha oyitim ör uje Jesucristo wichi uu ôryok İrhîch. Oyitim ör uje ôryok olak yilo pork ôryok de shî par uje oyakashim olak pork ôryok Jesús ir İbiyo. <sup>6</sup>Shî Porrosht wichi uje chihlehetkite İm: —Tuu luu tokole hn dihit asa dİhlelta.— Wichi shî itso uje chihit eyok aho toy par uje shuu yıraha erze uje ich om uje shiyokör par eyok uje shuu Cristo İshî eyok hnitewihî dahirkite.

<sup>7</sup>Ese uje Cristo shiyokör par eyok ich om. Nos wir eyok ye eyok ukurbope uje yuhu oso omasaha par Porrosht aabo. Shî eyok itso jarta hn erze ir ahwoso wir de eyok aho par uje oyuhu oso ochıraha uje ire ukurbo deyo de par shuu oso omasaha par ir aabo heke ye shî tãra eyokpe erze ukurbo par shuu oso omasaha par Porrosht aabo. <sup>8</sup>Shish kuche mİhnüwo ich kihniya tır ôryok per wir ye nihna oryôkpe. Uje erze mİhnüwo tır ôryok ich ye oyıraha uje oyiyokör per ye oyukwim Porrosht İbiyope. <sup>9</sup>Oshiyokörİhî ôryok uje ich mİhnüwo per Porrosht yelij noym ôryok. Oshiyokör shî itso uje wir oshuu ôryok kay per ye ör pwele uje oduhu ôryok oduhu oyıtpe. <sup>10</sup>Shish oloter ôryok shî itso uje oloter Jesusni. Sehe oduhu ôryok oduhu oyiti per Jesús takashim ôryok heke shuu İmeheeych uje ire yesh İka. <sup>11</sup>Uje yesh ôryok İka shish sehe oduhu ôryok oduhu oyiti pork ye oyotiis Jesuspe. İmeheeych uje Jesús yesh İka pork shish takashim ôryok. <sup>12</sup>Uje oyanimirãha Porrosht ahwoso ich shish sehe oduhu ôryok oduhu oyiti, per erze Porrosht İbiyo uje oyiyokör shuu olak İkirıt de uje yelij nihna ire. <sup>13</sup>Porrosht ahwoso tata shuu itsorz İm:

—Yeëk de uje tatim Porrosht im: “Ye tokotiis owape heke titim oso.”—  
 Öryok itspo ye oyotiis Porroshtpe heke oyitim oso <sup>14</sup>pork oyiraha uje  
 Porrosht shuu eyok İrhîch Jesús ikponi. Heke oyiraha uje wichi tyenij  
 shuu eyok ikpo nehe pork ye oyotiis Jesuspe hn olak tyenij meylo öryok  
 uje Jesús nos hnoy eyok seya eyok dahir nehe. <sup>15</sup>Nos wir erze kuche  
 mihñüwo tir öryok pork oyitim olak Cristo heke uje oso ma okihniya  
 ochunt Porrosht ahwoso ich ma okihniya ode uje onina Porrosht hn  
 oshuu ire dich. <sup>16</sup>Heke ye oyuhu öryok dosdarakpe hn oyukwim Porrosht  
 ir İbiyo. Eyok ukurbo saraãshi ire uje sihna ire uje yitir par eyok İlaro per  
 eyok aho kal deeych shi itso uje ich ichirãha <sup>17</sup>pork uje yuhu eyok eyuwo  
 chishew erze uje ich İhirtso uje yelij nihna ire uje de Porrosht ahir ich ye  
 yuunape erze kuche mihñüwo uje tir eyok uje ehn eyok de nãhu İrmo.  
<sup>18</sup>Heke ye yuhu eyok eyuwo tisir erze uje de nãhu İrmo. Wir tyenij sihna  
 ire. Shi yuhu eyok eyuwo tisir erze uje yahpaa yomope uje de poorc. Wir  
 yelij nihna ire.

**5** <sup>1</sup>Yirahalo uje ehn eyok ikaha nãhu İrmo eyok yũhur shi itso  
 pwertit uje yebuhulo, hn uje yitilo ich sihna ire. Mahn eyok yũhur  
 ahle depo shi itso ihyuwo uje de poorc uje Porrosht shiyokör, ye oso  
 oniyokörpe. Wir yelij nihna ire. <sup>2</sup>Uje eyok de nãhu İrmo ich eyok itso uje  
 eyok İhnakosh pork sehe yuhu eyok yũhur ahle masaha eyok shichish  
 par yebuhu poorc nehe. <sup>3</sup>Yahmür uje eyok yũhur ahle masaha eyok  
 shi itso uje yonãha eyok ishuwo pork uje yiti ich eyok yũhur İler tokole  
 heke eyok ichibiyo ich shi itso uje İmehship eeych. <sup>4</sup>Uje ehn eyok yũhur  
 İler de nãhu İrmo ich İhnakosh hn yitirãha, sehe yuhu eyok yũhur ahle  
 shichish. Ye yahmürpe uje eyok yũhur İler sihna ire shuu eyok itso uje  
 yimehe eeych per sehe yuhu eyok yũhur ahle. Eyok yũhur ich shish ma  
 İler nehech sihna ire per eyok yũhur ahle de uje yelij nihna ire. <sup>5</sup>Porrosht  
 wichi uje nos nishii eyokni par uje erze eyok yũhur ahle masaha eyok.  
 Sehe duhu yiraha uje ich ũru itsorz heke İshim eyok Dechibichni. <sup>6</sup>Heke  
 ye eyok koswãhape pork yiraha uje ehn eyok ikaha nãhu İrmo ich eyok  
 dukuhlehe poorc uje eyok İrhîch de. <sup>7</sup>Ele ahle ye yomo Porroshtpe per  
 wichi tibey eyok. Yirahalo uje tibey eyok pork ye yotiislo irpe. <sup>8</sup>Shish  
 ye eyok koswãhape. Yahmürlo yukwim erze eyok yũhur uje de nãhu  
 İrmo par yitirlo eyok İrhîch ahir. <sup>9</sup>Kimiji ehn eyok İka o kimiji yiti shish  
 tyenij yibite par uje yiyokör uje eyok İrhîch sahmür, <sup>10</sup>pork nos wir eyok  
 tyenij yiyehelo Cristo ir İle İkich nehe hn İshim eyok erze uje yerz kimiji  
 yiyokörlo uje ich om o kimiji yiyokörlo uje ich mihñüwo uje ehn eyok de  
 nãhu İrmo.

**Cristo shuu Porrosht eheth kiisihi Porrosht aabo.**

<sup>11</sup>Heke titim olak. Oyiraha eyok İrhîch hn shish oyitila ire heke oyitim  
 oso oyuhu İmeheeych uje Cristo İshi ör hñitewihi Porrosht ahirkite.

Porrosht chiraha òryok aho. Chiraha erze uje oyitim olak ich ùru, hn tahmūr uje olak erahalo toy. <sup>12</sup>Ye òryok narim oryokĩhi olak ikichpe. Shi oyitim olakpo par uje olak aylĩhi òryok, pork ode uje oshuu yeẽk dich hn onarim ire hn ye oduhu deyuwo tisĩr kimiji ire eheth yũhurash. Erze uje titim olakike shuu erahalo uje tyenij atimlo òr. <sup>13</sup>Kimiji eylo òryok totiloho ich ye latikish pork shi oyiyokõr uje Porrosht sahmūr. Kimiji ye eylo òryok totilohope ich shi oyiyokõr par oyakashim olak. <sup>14</sup>Yiraha uje Cristo sahmūr eyok heke ziyokõr uje ire sahmūr pork yiraha uje wichi tooho nos wir oso heke par Porrosht ich shi itso uje nos yiti hn yoshi eyok hñitew pork Jesús ishikite. <sup>15</sup>Cristo tooho nos wir oso par uje erze uje ye olotiis irpe uje ehn òr ika ich ye oniyokõr uje shi òr ire otsahmūr. Uje ehn òr ika shi tyenij oniyokõr uje Cristo sahmūr, pork wichi uje nos tooho eyokkite hn ikpo. <sup>16</sup>Heke oyitim olak. Antni ich eyok eyuwo shi itso ïrmo oso òr eyuwo per ele ahle ich ye eyok eyuwo ïlorzpe. Antni uje eyok eyuwo tisĩrĩhi Cristo ich eyok eyuwo shi itso ïrmo oso òr eyuwo per ele ahle ich ye eyok eyuwo ïlorzpe, <sup>17</sup>heke yeẽk uje ye lotiis Cristo ich ire kinaha. Ir iluu ich ahle. Wichi ye ilo uje wapni pork ir iluu ïler ich nihyok. <sup>18</sup>Nos wir erze ir iluu ahle shi tãra Porrosht. Wichi uje shuu Cristo ishi eyok hñitewihi dahĩrkite par uje Porrosht eheth kiisihi eyok, hn wichi uje ishim òryok erze obiyo uje oyiyokõr par uje oyitim òr par oyuhu Porrosht eheth kiisihi òr toy. <sup>19</sup>Oyanimirãha ir ahwoso oyitim oso uje Cristo ishi òr hñitewihi Porrosht ahĩrkite par uje shuu Porrosht eheth kiisihi òr. Heke ele ahle hn Porrosht ye eyucha òr hñitewpe pork Cristo nos ishikite. Wichi uje ishim òryok erze obiyo par uje oyanimirãha ir ahwoso oyitim oso. <sup>20</sup>Heke òryok Cristo ir ibiyo uje otsii embajador par uje oyitim oso ir ahwoso. Shi Porrosht wichi uje shuu oyitim oso, heke oyitim òr shi itso uje Cristo tatim òr par uje oshuu Porrosht eheth kiisihi òr ire. <sup>21</sup>Cristo ye niyokõr latik uje mĩhnik per Porrosht sehe dosir eyok heke shuu Cristo ishi eyok hñitewihi dahĩr. Heke uje ye yotiislo ire ich nihyok ye eyok hñitew chihĩ Porrosht ahĩr shi itso uje yelij ziyokõrlo uje mĩhnũwo uje Porrosht ye nahmũrpe.

**6** <sup>1</sup>Òryok Porrosht ir ibiyo. Wichi takashim òryok, heke oyitim olak par uje ye uhulo olak ibiyo uje Porrosht ishim olak tokole uje ye jukur. <sup>2</sup>Pork Porrosht tatim òrni ïm: —Uje terihĩ uu deeych uje ich om hn takĩr owa. Uje terihĩ ese deeych par uje amsaha par uje owa yok pijo ich takashim owa.— Èrlo òryok. Ele ahle ich terihĩ ese deeych uje ich om uje Porrosht tata. Ele ahle ich terihĩ ese deeych par uje yeẽk masaha par Porrosht aap. <sup>3</sup>Ye oyiyokõr latik par uje oyontew yeẽk uje sehe masaha par Porrosht aap par uje nihyok uje yeẽk chiinehñim òryok ibiyo. <sup>4</sup>Shish oyuhu imeheeych uje òryok Porrosht ir ibiyo. Ich imeheeych pork shish oyinta oso, hn òryok ewenta kuche mĩhnũwo uje tĩr òryok, hn òryok ewenta uje kuche nihyokĩhi òryok ahĩr, hn oshiyokõr mĩhnũwõho òryok.

<sup>5</sup>Otsepyër òryok ochîra òryok shikote o kimiji pchich, hn ochimchaha òryok karsel eheth, hn erze uje otsitak òryok oshuu dît oso otakisho lawich par sehe odishew òryok, hn òryok ibiyo ich dospa. Dihlak ich ye òryok pwele uje oyumope, hn òryok iyuwo sêhi òryok. <sup>6</sup>Imeheeych uje òryok Porrosht ibiyo pork shish oyiyokôr uje ich om, hn oyiraha Porrosht ir iluu, hn òryok ewenta erze kuche mîhnûwo uje oso oshiyokorîhi òryok. Shish oyakashim yewo, hn Porrosht Ichîbich de òryok aho, hn shish oyahmûr pish yewo. <sup>7</sup>Shish oyîita uje ich ûru, hn Porrosht takashim òryok chîra lakirbo. Shish oyiyokôr uje ich om heke shi itso uje kuche de òryok hme waächta hn waachjârza par uje oyatsikir òryok imâho. <sup>8</sup>Ode uje onarim òryok, hn ode uje ye oduhu òryok jukur, hn ode uje ochiyuhu lahwoso mîhnuwôho òryok, hn ode uje ochiyuhu lahwoso omoho òryok. Ode uje otata uje òryok shi oyehnyër oso per shish oyîita uje ich ûru. <sup>9</sup>Erze oso uje ode nâhu îrmo ye odîraha òryok iluupe per Porrosht chiraha. Shish sehe oduhu òryok oduhu oyîti per shish òryok ika. Oshiyokôr kuchehe òryok uje ich dospa per ye oyitpe. <sup>10</sup>Sehe oduhu òryok dosdarak heke oshiyokôr kuche mîhnuwôho òryok per shish òryok ayla. Òryok losuhlaabo per oyuhu oso okîhniya îhîr deyo pork oyuhu ôr owich de Porrosht ahîr. Shi itso uje ye òryok kushjârîrsh per nos kuche de par òryok. <sup>11</sup>Olak uje opak dechi dît Corinto ich nos oyîtîm opak Porrosht ahwoso oyuhu imeheeychni. Ich oyahmûr pishi opak. <sup>12</sup>Ye oryôkpe uje oyontew opak. Shi opak uje ontewlo opak pork yêrij ahmûrlo pishi òryok. <sup>13</sup>Shi titîm opak tuu opak itso uje yok pîjo. Sehe tuu ma ahmûrlo òryok itso uje oyahmûr opak.

### Porrosht aabo wir Porrosht ihyuch.

<sup>14</sup>Titîm opak par uje ye etîrlo erze uje ye Porrosht aabope par eyâhalo opak irêhte hnii par eyâhalo opak abîrk pork ye opak îlo ôrpe hnii uje akishlo opak kuche. Ye ôr îlyepe erze uje otsahmûr oshiyokôr uje ich om hn erze uje otsahmûr oshiyokôr uje ich mîhnûwo. Shi itso luu hn dihlelta, ye pwele uje îyepê. <sup>15</sup>Cristo hn Satanás ¿je ôr eyuwo îlye? Ye ôr eyuwo îlyepe. Hn Porrosht aabo hn erze uje ye Porrosht aabope ¿je ôr eyuwo îlye? Ye ôr eyuwo îlyepe. <sup>16</sup>Porrosht ir aabo wir ir ihyuch. Wichî shish ika. Ye eyok îlope erze oso uje oteeychâha kojano po ochii ir porroshtîhi. Ich imeheeych uje eyok Porrosht ihyuch pork Porrosht im: —Tyenîj takabuhu opak aho nehe hn shish yok de opak ahîr. Tyenîj yok uu opak Porrosht hn opak yok paabo nehe.— <sup>17</sup>Heke eyok îrhîch tatîm ôr im: —Ye ahakôrlo erze mîhnûwo uje ôr ire oshiyokôr. Atokolîhîlo ôr ahîr hn eylo ôr isa, hn pehet kîisihi opak <sup>18</sup>hn yok uu opak Deych hn opak yok pîjo hn opak yok pîje.— Wir uje eyok îrhîch tata. Wichî ich ir ukurbo deyo de.

**7** <sup>1</sup>Pishîbo watsaklo, Porrosht chîbite lahwoso par debuhu eyok aho, heke tyenîj yukwimlo erze kuche mîhnûwo hn ye niyokôrlo pork



erze kuche mihnūwo uje yiyokōrlo ich shuu eyok aho mihnūwo hn shuu eyok ichibiyo mihnūwo. Tyenij yitililo Porrosht hn shish yiyokōrlo uje ire sahmūr.

**Porrosht aabo oshuu Pablo ehēt kiis.**

<sup>2</sup>Sehe titim olak par uje ahmūrlo ōryok uhulo ilo uje oyahmūr pish olak. Ye oyiyokōr mihnikīhi yeēkpe, hn ye oyuhu yeēk niyokōr mihnikpe, hn ye oyehnyēr yeēkpe. <sup>3</sup>Uje titim olak tuu itsorz ich ye peyuwo tisīr uje ahakōrlo uhulo itsorz. Titim olakike uje ich oyahmūr pishi olak. Kimiji yehe eyok ika hn kimiji yitilo ich shish oyahmūr olak.

<sup>4</sup>Tikiraha uje shish ahakōrlo uje tahmūr. Ich tahmūr uje ahakōrlo. Ich uhulo yok tukuurapo. Shish kuche mihnūwo kihniya tīr ōryok per uhulo yok aylpa. <sup>5</sup>Pork uje oyaachīhi hnimich Macedoniani ich oyirmtsīr per ye oyiyarpe. Uje oyitīr lekitiyo ich shish oshiyokōr mihnikīhi ōryok. Shish sehe oso oduhu ōryok, hn shish oyuhu ōryok eyuwo tisīr erze uje omasaha par Porrosht aabo kimiji ōr owich om o kimiji ye ōr owich ompe. <sup>6</sup>Per Porrosht wichi uje shuu wir ōr duura erze uje ōr dosdarak heke shuu oyuurapo uje shuu Tito taachīhi ōryok ahīr. <sup>7</sup>Ye shi uje taachīhi ōryok ahīrpe uje shuu oyuurā, mahn shuu oyuurapo uje tōhwa erze olak ahwoso hn tatim ōryok uje olak uje ebuhulo dīt Corinto uhulo ire duuraponi. Wichi tatim ōryok uje olak sehe eychimlo ōryok toy, hn tatim ōryok uje entilo uje uhulo yok dosdarakni hn eyerhlo. Tito tatim ōryok uje shish olak eyuwo tisīrīhi yok. Heke ich ma shuu yok aylpa. <sup>8</sup>Uje tichew asa hutita tokosim olakni ich tuu olak dosdarak. Wap ich yok dosdarak uje tokosim olak asa yok hutita per ele ahle ich ye yok dosdarakpe. Tikiraha uje asa hutita waa je tichew hn tokosim olak ich shuu olak dosdarak per shi par daalo arhaabo. <sup>9</sup>Ye yok aylpe uje tuu olak dosdarak, per ele ahle ich yok aylo pork Porrosht shuu olak dosdarak par uje shuu olak eeshlopo ahakōrlo uje ire sahmūr. Heke ye oryōkpe uje oyiyokōr mihnikīhi olak. <sup>10</sup>Uje Porrosht shuu yeēk dosdarak ich shi sehe duhu noym shiyokōr uje ich mihnūwo par uje shiyokōr uje ire sahmūr. Uje shiyokōr uje Porrosht sahmūr ich ye dosdarakpe, per uje erze īrmo oso ōr dosdarak ye latik nishii ōr iluupe. Ich uhurc shi shuu otoy. <sup>11</sup>Uhu olak eyuwo tisīr asa hutita waa je tichewni hn tokosim olak. Uje olak ler ich Porrosht shuu olak dosdarak heke olak kemihi ese mīhnt uje yet shiyokōrīhi olak ehēt. Porrosht shuu enshiilo ese kuch mīhnt uje de olak ehēt. Porrosht shuu etakloni ese kuch mīhnt uje de olak ehēt. Wichi shuu olak eyuwo tisīrni uje sehe uhulo takaha titīr olak par uje takashim olak. Sehe enshiilo shichish ese kuch mīhnt uje de olak ehēt. Shuu eyuhulo wichi olak ehēt ese hnakīrbich uje shiyokōr mihnikīhi olak ehēt. Wichi shuu nos ahakōrlo uhulo itsorz par uje ebitlo orhōta uje enshiilo ese

kuch mīhnt uje de olak ehēt. <sup>12</sup>Heke uje tichew asa hutitani hn tokosim olak ich ye tokorzīhi ese hnakirbich uje shiyokōr mīhnik hn ye tokorzīhi ese hnakirbich yetpe uje ese yet shiyokōr mīhnikīhi ire. Shi tichew asa hutita tokosim olak par uje tuu imeheeych Porrosht ile ikich uje olak sehe ahakōrlo uje ōryok oyahmūr. <sup>13</sup>Heke uhulo ōryok duuraponi. Ye shi esepe per ich ōryok aylpo uje Tito taachīhi ōryok ahir hn ich ayla toy pork nos uhulo ire ehēt kiis. <sup>14</sup>Uje ehn yahpaa tuu Tito do tīr olakni ich yok narim olak titim Tito uje ahakōrlo om. Uje Tito taachīhi olak ahirni ich imeheeych uje nos ūru erze uje titim irni, heke ye tikipookpe. <sup>15</sup>Ire ma sahmūr olak uje eyucha uje nos ahakōrlo uje oyitim olakni pork ich ahmūrlo uje Tito tekirīhi olak hn atililo ire. <sup>16</sup>Yok ayla pork tikiraha uje ahakōrlo uje tahmūr.

### Akashimlo Porrosht aabo yewo uje ōr losuhlaabo.

**8** <sup>1</sup>Pishibo watsaklo, sehe oyuhu erahalo uje Porrosht shiyokōr par erze ir aabo uje otakisho lawichīhi lekitiyo hnimich Macedonia. <sup>2</sup>Kuche mīhnūwo ich kihniya tīr ōr, per uje ochunt uje sewit sēhi erze Porrosht aabo uje ode dit Jerusalén ich sehe otakashim ōr hn ōr ayla. Ahni wir ōr losuhlaabo pisho per oshim ōr ich kihniya. <sup>3</sup>Tikiraha uje oshim ōr uje ōr pwele hn oshuu iyuwe. Nīhyok uje yeēk chīrok ōrni. <sup>4</sup>Shi ōr ire otsapur pish ōryok par uje sehe otakashim erze Porrosht aabo uje ode dit Jerusalén. <sup>5</sup>Ōryok eyuwo tisīr uje wir shi oshimīhi ōr pikaap per ich oshuu iyuwe. Wap ich oshimīhi ire eyok īrhīch par uje sehe oniyokōr ir ībiyo hn oshimīhi ire ōryok toy par uje otakashim ōryok. Erze uje oshiyokōr wir uje Porrosht sahmūr. <sup>6</sup>Heke oyitim Tito par uje sehe oyuhu nimit erze obiyo uje shiyokorīhi olak ahirni uje eeshilo hnote yēr par erze Porrosht aabo uje ōr losuhlaaboho wahacha Jerusalén. <sup>7</sup>Shi olak iluu par enahalo olak uje ahakōrlo kuche. Shish enahalo olak uje ye otiislo Cristope hn enahalo olak uje animirāhalo Porrosht ahwoso hn enahalo olak toy par erahalo pishi Porrosht ahwoso. Shish emitlo olak par uje ahakōrlo Porrosht ībiyo. Hn ahmūrlo pishi ōryok. Shish enaha olak uhulo itsorz heke titim olak par uje enahalo olak par akashimlo erze Porrosht aaboho wahacha dit Jerusalén toy. <sup>8</sup>Uje titim olak tuu itsorz ich ye tirok olakpe. Shi titim olak uje erze yewo otsahmūr otakashim erze Porrosht aabo uje kuche nihyokīhi ōr ahir. Heke tuu imeheeych uje olak ahmūrlo ōr toy hn sehe akashimlo ōr. <sup>9</sup>Erahalo uje eyok īrhīch Jesucristo ich sahmūr pishi eyoklo. Wichī ich īrhīch dich per shuu ire losuhlaap par uje takashim olak shuu olak īhīr deyo uje shuu olak Porrosht aabo. <sup>10</sup>Heke takit olak par uje emitlo erze obiyo. Āyt yetni ichii ebitlo olak ahwoso par eeshilo hnote yēr hn ichii eeshilo yēr. <sup>11</sup>Ahmūrlo eeshilo erze hnote yēr heke sehe tuu eeshilo yēr shichish par emitlo. Ich om uje ebitilkite erze hnote uje olak pwele uje de olak ahir. <sup>12</sup>Porrosht ayla uje

yeëk sahmūr ishīm ire kuchit per shi uje de ire ahir, ye uje nihyokīhi ire ahirpe. <sup>13</sup>Ye titim olak par uje akashimlo erze yewo uhulo òr kuche kihniya hn shi uhu olak losuhlaabo. <sup>14</sup>Uje kuche chīhi olak ahir hn erze yewo kuche nihyokīhi òr ahir ich akashimlo òr, hn uje kuche de òr ahir hn nihyokīhi olak ahir ich tyenij wir otakashim olak. Heke nos olak itsye pork akashimloye. <sup>15</sup>Porrosht ahwoso tata im: —Erze israel oso uje otsamita manakite kimiji onamita kihniya ich ye oduhu sowe, hn kimiji onamita oduhu pikaap ich ye oduhu sehi pork otakashimye oshuu itsshipye.—

### Pablo shuu Tito hōr ohno otīr dīt Corinto.

<sup>16</sup>Titim olak uje ich tikinship Porrosht uje shuu Tito sahmūr pishi olak shi itso yok uje ich tahmūr pish olak. <sup>17</sup>Titim Tito par uje hno tekirihi olak hn ire sahmūrpa uje tīr olak heke tīr olak pork sehe do. <sup>18</sup>Eyok leshībich yet tyenij hno īya Tito. Nos wir Porrosht aabo uje ode lekītiyo ochiraha ire pork chirahapa sanimirāha Porrosht ahwoso tatim òr uje Jesús ishi òr hnitewīhi Porrosht ahirkite. <sup>19</sup>Ye shi erzepe per Porrosht aabo òr wee nohmīramo ochiīhla wichi par uje shish īya òryok hn takashim òryok uje oiyokōr erze obiyo par oyakashim erze Porrosht aabo uje òr losuhlaabo. Uje oiyokōr oyuhu itsorz ich oyuhu eyok Irhīch ich dich hn oyuhu imeheeych toy uje sehe nos oyosir oso <sup>20</sup>par uje ye latik ninehnm òryok uje oyiish erze hnote yēr uje ich kihniya par oyosim erze Porrosht aabo uje òr losuhlaabo <sup>21</sup>heke sehe oiyokōr uje ich om. Eyok Irhīch chiraha hn sehe oyuhu oso odīraha toy uje oiyokōr om. <sup>22</sup>Oyuhu eyok leshībich yet īya Tito hōr toy. Wichi shish oyosim ir ibiyoni par oyeychīm hn shish shiyokōr uje ich om. Wichi sehe nōya òr par uje hno tīr olak pork chiraha uje shish ahakōrlo uje ich om. <sup>23</sup>Kimiji olak yeëk ye diraha Tito ich wichi uu yok piyhērak uje takashim olak. Erze eyok leshībo uje òya Tito wir otāra erze Porrosht aabo uje otakasho lawichīhi lekītiyo. Wir uje oshuu otirēt. Uje oshiyokōr ese obich ich onarim Cristo. <sup>24</sup>Uje ahakōrlo oomīhi Tito hn erze uje òya ire ich nos wir Porrosht aabo ochiraha uje ahmūrlo òr hn uhulo imeheeych uje ahakōrlo om itso uje titim òrni.

### Porrosht aabo tyenij otakashimye.

**9** <sup>1</sup>Ye nesitpe uje tichew tibite ana hutita titim olakpo erze hnote uje eeshilo yērni par uje akashimlo erze Porrosht aabo pork ich erahalo. <sup>2</sup>Tikīraha uje sehe akashimlo òr heke titim Porrosht aabo uje ode lika hnmīch Macedonia too: —Ich āyt nohmīra uje erze Porrosht aabo uje ode hnmīch Acaya sehe otakashim erze Porrosht aabo uje ode Jerusalén par oshīmīhi òr hnote.— Uje Macedonia oso ochunt uje sehe akashimlo erze Porrosht aabo ich sehe otakashim òr toy. <sup>3</sup>Titim erze Porrosht aabo

uje eeshilo hnote yěrni. Ye tahmūrpe uje yok kushīyak heke tuu eyok leshibo ohno otīr olak par oteychīm kimijī nos emitlo hnote owich itso uje titim ōrni <sup>4</sup>pork kimijī Macedonia oso onōya yok uje takaha titīr olak hn olak ye emitlo hnote owilope ich uhulo oyīpook hn ich shuu apooklo toy pork titim ōrni uje olak ich nos emitlo. <sup>5</sup>Heke ma om tuu eyok leshibo ohno wap otīr olak par onishii erze hnote owich uje atimlo yokni par uje ebitlo. Heke uje takaachīhi olak ahir nehe ich nos de. Ye oyirok olakpe par uje ebitlo erze hnote. Shi ahmūrlo heke ebitlo. <sup>6</sup>Ahnūwo uje titim olakike shi titeēta. Kimijī akashimlo erze losuhlaabo pikaap ich shi itso ese uje chukwēr pikaap heke chekushu pikaap per ese uje chukwēr kihniya ich chekushu kihniya pork Porrosht ma takashīm erze uje ma otsōsir yewo. <sup>7</sup>Kal nohmīr nohmīr shuu deyuwo tisīr par ishimīhi. Ye ompe uje yeēk ishim uje ye nahmūr dosimpe, hn ye ompe ishim shi pork yeēk chīrok ire. Porrosht sahmūr erze uje ich ōr ayla uje oshīm <sup>8</sup>hn ire nos pwele ishimīhi olak kuche uje olak nesita hn shuu iyuwe par uje shish de olak ahir uje olak nesita hn par uje olak pwele akashimlo yewo hn uhulo sowe pork nos wīr erze obiyo ich om. <sup>9</sup>Porrosht ahwoso tata shuu itsorz im: —Uje yeēk sahmūr yok ich ye narhak ir kushjāro par ishimīhi erze losuhlaabo hn wīr ye olikey uje ishimīhi ōr erze uje ich om hnii Porrosht ye dīkeype uje wichi shiyokōr.— <sup>10</sup>Porrosht wichi uje ishim oso jōro eyhi par uje ochukwēr hn ishim ōr poso par uje otew. Tyenij nos ishim olak uje olak nesita par uje olak pwele akashimlo erze yewo hn shish de olak ahir ma kihniya. <sup>11</sup>Porrosht tyenij takashīm pishi olak par uje olak pwele akashimlo pishi erze yewo toy hn erze hnote uje asimihilo ōryok par uje oyosimīhi ōr ich shuu onina Porrosht. <sup>12</sup>Uje asimihilo erze Porrosht aabo erze hnote ich akashimlo ōr hn ich uhulo wīr onina Porrosht toy. <sup>13</sup>Uje akashimlo ōr uhulo itsorz ich uhulo imeheeych uje olak ye otislope uje Cristo ishi olak hnitewīhi Porrosht ahīrkite hn uhulo oso onarim Porrosht uje akashimlo ōr hn akashimlo yewo toy. <sup>14</sup>Heke wīr ōr eyucha olak hn ōr orar otsapur Porrosht par takashīm olak pork Porrosht wichi uje shuu akashimlo pish ōr. <sup>15</sup>Tikinship Porrosht pork shuu Cristo ishi eyok hnitewīhi dahīrkite. Ich ihīrtpa uje itsorz.

**Pablo wichi apóstol heke ir ukurbosh.**

**10** <sup>1</sup>Yok Pablo. Sehe titim olak kuchērck. Erahalo uje Cristo ile om heke shish shiyokōr uje ich om. Ode uje otata uje yok de olak ahir ich tikītiloho uje titim olak per uje yok de dukuhla ich tobīter olak. <sup>2</sup>Uje takaha titīr olak nehe ich ye ahakōrlo mihnūwo uhulo tobīter olak. Tikīraha uje olak yewo ode. Otata uje tiyokōr itso erze ĩrmo oso oshiyokōr. Wīr uje tyenij tobīter ōr nehe. <sup>3</sup>Ich ūru uje yebuhulo nāhu ĩrmo per eyok imāho kināho, ye ilo erze ĩrmo oso ōr imāhope. <sup>4</sup>Erze kuche uje ĩrmo oso ochīrye par oteye wīr ye jukur par eyok. Shi Porrosht

ukurbo de par uje yĩrlo eyok imāho heke pwele yihna erze uje sehe onontew Porrosht ahwoso. <sup>5</sup>Uje yitim oso Porrosht ahwoso hn oshiyokos eyok ich yinta ōr yikitkēr ōr nehech ōr aho kiis hn ye yuhu jukur erze ōr ahwoso uje otata uje sontew ōr ye duhu odiraha Porroshtpe, hn yuhu ōr eyuwo tisĩr erze uje ich om par uje oshiyokōr uje Cristo sahmūr. <sup>6</sup>Uje nos ahakōrlo uje Cristo sahmūr ich oyimit ōryok par uje oyobiter erze Porrosht aabo yewo uje ode olak ahir uje yesh oshiyokōr uje ich mihnūwo. <sup>7</sup>Olak shĩ eychimlo oso ōr eeyo hn ebitlo uje ōr iluu ich om. Kimiji yeēk dibite uje ich ūru uje ye lotiis Cristope ich tyenij chiraha uje ōryok itspo, ye oyotiispe itso ire. <sup>8</sup>Eyok Irhich ishim ōryok ukurbo par uje oyakashim olak oyuhu olak iluu ma itso Cristo ir iluu. Ye dosim ōryok ukurbo par uje oyiyokōr mihnikihĩ olakpe. Kimiji yok narim yok tuu iyuwe pikaap ich ye tiyokōr mihnikpe pork ishim ōryok erze ukurbo. Nĩhyok yeēk pwele tata uje tehnyēr olak hn shuu tikipook. <sup>9</sup>Uje tichew erze hute hn tokosim olak ich ye tahmūrpe uje tuu as olak ibe <sup>10</sup>pork yewo otata otsii: —Pablo ir ahwoso ich ihnpa uje chichew chibite hute mahn uje wichi de olak ahir ich ir ahwoso ye ihnpa. Uje chiilehet ich shĩ itso uje ye ir ukūrbirsh.— <sup>11</sup>Erze uje otata oshuu itsorz ich sehe tuu odiraha erze pahwoso uje tichew tibite erze hute ich shĩ itso uje yok de olak ahir hn titim olak.

<sup>12</sup>Ōryok ye ōryok narim oryōkpe oyuhu ilo erze yewo uje shi onarim ire pork uje wir oteychim yewo ōr ibiyo par uje ochiraha kimiji ōr ibiyo ich ma om je erze yewo ōr ibiyo ich oshiyokōr itso uje ye ōr eyuwĩrsh. Kimiji oteychim yewo par ochiraha kimiji ōr iluu ich ma om je erze yewo ōr iluu ich oshiyokōr itso uje ye ōr eyuwĩrsh. <sup>13</sup>Mahn ōryok ye ōryok narim oryōkpe oyuhu sowe erze uje Porrosht chibite par uje oyiyokōr ir ibiyo. Porrosht ishim ōryok par uje oyanimirāha ir ahwoso nehech oyaachĩhi ese dit Corinto uje olak de. <sup>14</sup>Heke ye oyiyuwepe uje Porrosht ishim ōryok par oyiyokōr uje oyaachĩhi olak ahirni. Ōryok webich oso uje oyāra dukuhla nehech oyaachĩhi olak ahir par oyitim olak uje Cristo ishi olak hnitewihĩ Porrosht ahirkite. <sup>15</sup>Ye ōryok narim oryōkpe erze obiyo uje yewo oshiyokōr pork wir ye ōryok ibiyo, per shish sehe oyuhu olak ma ye otiislo Cristo par uje ōryok pwele oyuko oyitĩr ma dukuhla. <sup>16</sup>Sehe oyitĩr erze hnimo uje de olak pit hn oyanimirāha Porrosht ahwoso oyitim oso uje Cristo ishi ōr hnitewihĩ Porrosht ahirkite hn ye ōryok narim oryōkpe erze obiyo uje yewo oshiyokōrni. <sup>17</sup>Uje yeēk sehe narim ire ich ma om tyenij narim eyok Irhich. <sup>18</sup>Kimiji hnakirbich narim ire ich ye jukur per kimiji eyok Irhich narim wichi ich om.

### Oso ode uje ochii ir apostolehe.

**11** <sup>1</sup>Sehe tuu hap enthilo yok uje titim olak. Shĩ yok itso totihlo uje titim olak. Hap enthilo yok. <sup>2</sup>Ich yok ajirmik pork tarhāk olak,

hn uje yok ajirmik shi tãra Porrosht. Yok tuu amsahaloni par Porrosht aabo heke shi olak itso timcharrza phãrrza pork ye ahakõrope uje mĩhnik hn tokosim olak hnakirbich nohmet shi itso olak abich. Wichĩ hnakirbich Cristo. <sup>3</sup>Ese echeẽt uje sehnẽr Evakite ich eykdeyo. Tikitila uje shi itso uje ire sehnẽr Evakite ich yeẽk sehnẽr olak nehe shuu olak eyuwo kinãho par uje ye eeychãhalo pishi Cristo. <sup>4</sup>Kimiji yeẽk taachĩhi olak ahir hn sanimirãha Jesũs tatim olak per shuu kinaha ye ilo uje oyitim olak petikni, o kimiji nanimirãha tatim olak ichibich kinaha ye ilo uu Porrosht Ichibichpe uje masaha olak ahoni ich ahmũrlo õr ahwoso, o kimiji tatim olak kuchẽrk uje kinaha uje ishi olak hnitewihi Porrosht ahir ye ilope uje oyitim olak uje Cristo ishi olak hnitewihi Porrosht ahirkite heke ich ahmũrlo õr. <sup>5</sup>Erze uje otsehnẽr olak ich ochii ir apostolehe hn ochibite uje õr ma dũtuwo je yok. Per ye tibitpe uje õr ire ma dũtuwo je yok. <sup>6</sup>Kimiji ye tikirahapa uje tiipuhut per ich ma tikiraha Porrosht ahwoso. Ich nos oyuhu imeheeychĩhi olak ikich uje oyiraha Porrosht ir iluu. <sup>7</sup>Tanimirãha Porrosht ahwoso titim olak uje Jesũs ishi olak hnitewihi Porrosht ahirkite heke amsahaloni par olak Porrosht aabo. Ye tapur olak kuchepe par uje tuu asimlo yok. Shi tishew obiyo par uje tikiya uje nihyokĩhi pahir. ¿Je tiyokõr mĩhnik uje tishew obiyo tuu itsorz? <sup>8</sup>Erze Porrosht aabo yewo uje oshim yok ir hnote par tanimirãha Porrosht ahwoso titim olak ich shi itso uje tokorha õr hnote per ye tokorhape. <sup>9</sup>Uje yok de olak ahirni hn yok nesita kuche ich ye tirok olakpe par uje tuu akashimlo yok. Shi Porrosht aabo uje otãra wahacha hnimich Macedonia otekirihĩ yok wir uje oshim yok uje yok nesita. Heke ye tirok olak petikni par uje tuu asimlo yok kuche uje nihyokĩhi pahir hnii ele ahle ich ye tapur olak par asimlo yok uje yok nesita hnii pĩkaap. <sup>10</sup>Tikiraha uje Cristo ir ahwoso ich ũru uje tanimirãha, hn ich ũru toy uje ye latik pwele sontew yok par uje ye titim orĩhi wahacha hnimich Acaya uje olak de uje Cristo ishi õr hnitewihi Porrosht ahirkite. <sup>11</sup>¿Inaapo heke tiipuhut tuu itsorz? ¿Je tiipuhut tuu itsorz pork ye tahmũr olakpe? Porrosht chiraha uje tahmũr olak. <sup>12</sup>Shish tanimirãha Porrosht ahwoso hn ye tokoympẽ. Shish tanimirãha par uje tuu imeheeych uje shi õr ukushiĩ uje onarim ire hn otata uje õr ibiyo itso pibiyo. <sup>13</sup>Erze hnakirbo wir ye õr apostolpe. Shi sehe onehnẽr oso odii ir Cristo apostolehe per ye Cristo ir apostolpe. <sup>14</sup>Heke ye as olak ibe pork wir oshiyokõr oshuu ire itso Satanãs pork Satanãs chii ire Porrosht anjelehe. <sup>15</sup>Heke ye erahaklo. Erze uje õr Satanãs ibiyo oshiyokõr itso ire hn ochii ir Porrosht ibiyoho. Õr ibiyo ich mihnũwo heke tyenij mĩhnik tĩr õr nehe.

#### Kuche mihnũwo uje shish tĩr Pablo.

<sup>16</sup>Titim olakpo. Ye ompe uje yeẽk chibite uje yok totihla. Per kimiji eylo yok totihlaha ich shi titim olak par uje enthilo yok uje yok narim

yok pikaap. <sup>17</sup>Erze uje tyenij titim olak ye Porrosht tatim yokpe. Uje titim olak ich shi yok narim yok itso uje yok totihla. <sup>18</sup>Ich okihniya uje onarim ire otata uje oshiyokorihhi kuche nahu irmo heke yok narim yok toy. <sup>19</sup>Olak ebitlo uje ich olak eykdeyo per ahmürlo erlo wir or ahwoso erze uje or totihlo uje or ahwoso ye ompe. <sup>20</sup>Ich uhu olak itso totihlo pork uje wir ochii olak deloho, o kimiji ohnoy olak kuche, o kimiji onehnyer olak, o kimiji onarim ire, o kimiji oniyokor mihnikihhi olak ich shish olak ewenta heke uhu olak itso totihlo toy. <sup>21</sup>Kimiji tiyokor tuu yok ilo erze uje shi otsehnyer olak ich tikipookpa. Ich shi itso uje ye oryok ukurbirsh par oiyokor oyuhu oryok itso or. Per erze uje otsehnyer olak ich otsahmur uje onarim ire heke yok narim yok toy. Uje yok narim yok ich shi yok itso totihla. <sup>22</sup>Erze uje otsehnyer olak ¿je wir hebreo yewo? Ich yok itspo. ¿Je wir israel yewo? Yok itspo. ¿Je wir otara ir porokkite Abraham? Yok itspo. <sup>23</sup>¿Je wir Cristo ibiyo? Yok Cristo ir ibik uje tiyokor ma obiyo je or ire. Uje titim olak tuu itsorz ich shi itso uje yok totihla. Yok ma tiyokor obiyo je or ire, hn ma ochimchaha yok karsel ehete je or ire, hn ich ma otsepyer yok je or ire, hn shish kuche mihnuwo tir yok par uje sehe duhu tikiti per ye tikitpe. <sup>24</sup>Ich sinko bese uje israel oso ochishew yok hn oshuu yok ochira yok shikote oshuu otisker nehech treynta y nueve bese, <sup>25</sup>hn tre bese uje ochishew yok oshuu yok ochira yok phich, hn deeych yet oshuu yok ochira yok kojano po par uje oshuu tikiti, hn ich pohir tre uje tokonaha hn kara hn yaka. Dihlich sohmira hn deeych sohmira uje yok dechi onoota bahluta ehete pork pohorrza yaka. <sup>26</sup>Shish takaha titir lekityo, hn ich yarhak uje tikaha onoota waa je uushi, hn ich yarhak uje echiko ochishew yokihi dehet pehet, hn ich yarhak pork sehe pihnapso israel oso oduhu yok, hn ich yarhak toy uje sehe dihipo kinaho oduhu yok, hn ich yarhak uje yeek shuu yokihi dit ehete, hn ich yarhak uje yeek shuu yokihi hnimich uje isa, hn ich yarhak toy uje yok hmartihhi onoota bahluta ehete, hn ich yarhak uje erze uje ochii ir Porrosht aaboho sehe oduhu yok. <sup>27</sup>Shish tishew obiyo ich kihniya nehech tirmtsir, hn ich dihle kihniya uje ye yok pwele tukumpe, hn daalo de uje piyuwo sehi yok hn piich sehi yok toy pork nihyok ye pobisirsh, hn hmemit sehi yok toy, hn nihyok pishuwo uje ich om. <sup>28</sup>Kuche mihnuwo yewo tir yok toy. Ye shi erzepe per kal deeych ich nos wir kuche mihnuwo uje tir Porrosht aabo lekityo ich tukuuna toy. <sup>29</sup>Uje kuche mihnuwo tir Porrosht aabo yeek hn chuuna uje ye pwele ewentpe ich yok itspo tukuuna uje mihnuwo tir ire. Kimiji yeek duhu yet niyokor uje mihnik ich tiis puulo par ese uje shuu eyok leshibich shiyokor uje mihnik. <sup>30</sup>Erze uje otsehnyer olak ich oshuu yok narim yok heke tyenij titim olak kuche par tuu imeheeych uje yok ye pukurbirsh. <sup>31</sup>Porrosht uu eyok Irhich Jesucristo ir Deych wichi uje shish nos yeeychahalo. Wichi chiraha uje ye tiita pukushiipe. <sup>32</sup>Uje yok dechi dit Damasconi hn ese

rey Aretas ir gobernador uje dechi shuu ohyerptoso oyehe ese moraylt uhur uje de lekityo uje chipeësa dit par uje ochishew yok, <sup>33</sup>per ode uje ochimchaha yok kanasta eheth hn oshuu tikāha mintanta waa je de moraylt hn ochirmas yokihichis pit heke tikitokolihi wichi gobernador hme.

**Porrosht chowa Pablo kuchêrkni uje ye latik pwele nomo.**

**12** <sup>1</sup>Ye jukur par yok uje titim olak erze kuche uje tîr yokni hn yok narim yok tuu itsorz. Heke titim olak erze uje eyok Irhîch chowa yok hn erze uje tatim yok. <sup>2</sup>Tikiraha hnakirbich uje ye lotiis Cristope. Porrosht hnoy ire seya poôrc uje ire de par chowa kuchêrk hn shuu cheeshpo. Ich terihi katorse äyo hnii titim olak. Ye tikiraha kimiji doy ir yûhurrza o kimiji shi doy ir ichibich. Porrosht wichi uje chiraha. <sup>3</sup>Tikiraha uje Porrosht hnoy ese hnakirbich seya paraíso. Kimiji doy ir yûhurrza o kimiji doy ir ichibich, yok ye tikiraha. Porrosht wichi uje chiraha. <sup>4</sup>Ese hnakirbich chunt ahwoso uje Porrosht ye nahmûr uje tatpe, hnii uje tatim yewo. <sup>5</sup>Shi yok narim ese hnakirbich per ye yok narim yokpe. Shi yok narim yok uje titim olak erze uje shuu imeheeych uje ye pukûrbîrsh. <sup>6</sup>Kimiji sehe yok narim yok ich ye tuu yok ilo totihlope pork shish tiita uje ich ūru. Per ye tahmûrpe uje yok narim yok par uje ye latik tata uje yok dichpa. Shi uje oteychim yok hn ochunt yok ich ochiraha kimiji yok dich o kimiji ye yok dichpe. <sup>7</sup>Porrosht shuu tikiraha kuche ich kihniya per ye nahmûr uje tuu peyuwo tisîr uje yok ma dich je erze yewo. Heke ishîm yok ese uje shi itso wonti par uje chichew yok. Ese uje itso wonti wichi Satanás ibik uje shuu tîr yok par shiyokos yok. Heke ye tuu peyuwo tisîrpe uje yok ma dich je erze yewo. <sup>8</sup>Ich tre bese uje yok orar tapur eyok Irhîch par uje chiyuhu yokihi ese uje ich dospa <sup>9</sup>per Porrosht tatim yok im: —Tokosîr owa par uje owa ewenta pork wichi uje itso wonti de owa par shuu imeheeych uje pukurbo de.— Heke yok ayla hn yok narim yok pork ese uje itso wonti de yok par uje ye duhu pukûrbîrsh per shuu imeheeych uje Cristo ir ukurbo de hn shish takashîm yok. <sup>10</sup>Erze kuche mîhnûwo uje imehe yok shuu Cristo ich dich heke shish pehet kiis uje ye pukûrbîrsh. Kimiji oso otata uje ye yok jukur per shish pehet kiis. Kimiji kuche nihyokîhi pahir ich shish pehet kiis. Kimiji oniyokôr mîhnikîhi yok ich shish pehet kiis, hn kimiji kuche tîr yok par uje sehe duhu yok dosdarak ich shish pehet kiis. Uje ye yok pwele tiyokôr kuche ich Cristo ishîm yok pukurbo par uje tiyokôr.

**Pablo eyucha Porrosht aabo uje ode dit Corinto.**

<sup>11</sup>Titim olak. Tuu yok itso totihlo pork olak uhulo yok narim yok. Olak tyenîj olak narim yok, ye yokpe. Ich ye yok dichpe hn erze uje otsehnîyêr olak ochii ir apostolehe ye ôr ma deyope je yok. <sup>12</sup>Uje yok de olak



ahirni ich tikinta olak uje tiyokōr erze kuche uje ye latik pwele niyokōr uje shuu as olak ibe. Erze uje tiyokōr chibite orhōta uje ich ūru uje yok Porrosht ir apōstol. <sup>13</sup> ¿Latikpo erze uje tiyokōrni par erze Porrosht aabo uje otakasho lawichihī lekityo hn ye tiyokōr petikni par olak? Ese uje ye tiyokorīhi olak wichi uje ye tirok olakpe par uje tuu akashimlo yok. Kimiji mīhnik uje ye tapur olak par uje akashimlo yok ich sehe tuu olak perdonar yok. <sup>14</sup> Do bese uje tekirihi olakni hn ele ahle ich tinshii yok par uje takaha tekirihi olakpo per ye tapur olak kushjārope. Shi tukwi olak par uje tuu ahakōrlo uje Porrosht sahmūr. Olak erahalo uje pikihnnino ye ōr pwele odishew obiyope par uje otiya uje ōr deych hn ōr data ōr nesita. Shi ōr deych hn ōr data ochishew obiyo par uje otiya uje ōr aabo nesita. <sup>15</sup> Shi yok itso olak deych heke tahmūr tokosimihī yok olak par uje takashim olak hn tinaha yok par uje takashim olak par uje ma ahakōrlo uje Porrosht sahmūr. Uje shish ma tahmūr olak, ¿je om uje etaklo yok nehech yērij ahmūrlo yok? <sup>16</sup> Ode uje otata uje shish tehnyēr oso per ye tapur olak kushjāro petikni par tuu asimlo yok. ¿Je tiyokōr tuu ilorz par uje tehnyēr olak? <sup>17</sup> ¿Je tuu erze hnakirbo odo otīr olak par uje otsehnyēr olak? Ye tiyokōr tuu ilorzpe. <sup>18</sup> Tuu Tito hno tekirihi olak hn tuu eyok leshibich iya ire toy. ¿Je Tito nehnyēr olak? Ye nehnyēr olakpe pork Tito hn yok ōryok eyuwo itsye. Wichi shiyokōr itso yok. <sup>19</sup> ¿Je shish uhu olak eyuwo tisirīhi ōryok uje oyehnyēr olak hn sehe oyata? Ye oiyokōr oyuhu ilorzpe. Ōryok Cristo ir ibiyo heke nos oyitimihī olak Porrosht ile ikich erze kuche uje oiyokōr. Pishibo watsaklo, oyahmūr olak heke oyitim olak par uje ma ahakōrlo uje Porrosht sahmūr. <sup>20</sup> Titim olak tuu itsorz pork tikitiloho uje ye ahakōrlo uje tahmūr heke uje tekirihi olak nehe kimiji tish olak uje ye ahakōrlo uje Porrosht sahmūr ich tyenij tatsirāha pahwoso uje titim olak hn ye ahmūrlo uje itsorz. Tuu peyuwo tisir kimiji ahakosloye, o kimiji abitiloye kuche, o kimiji etakloye, o kimiji ekutirāha olak kuche, o kimiji eyehnimloye, o kimiji athilo lare, o kimiji olak narim olak, o kimiji ye akishlo olak eyuwope. <sup>21</sup> Tikitiloho uje tekirihi olak nehe hn Porrosht shuu tikipookihī olak ikich uje olak kihniya uje ahakōrlo erze kuche mihnnūwo hn ye moymlope. Heke uhulo tikiyerh kimiji ode olak ehēt uje oshiyokōr erze kuche mihnnūwo uje ye onōyhi pishye ahirpe hn shi omuhuye ahir, o kimiji hnakirbo ode uje oshiyokōr mihnnuwōhoye par uje omuhuye ahir, o kimiji timcher ode uje ōhiyer ahirpo, o kimiji hnakirbo ode uje otsahat loshipo o kimiji timcher ōr itspo, o kimiji pikihnnino hn pikihnnine oshiyokōr erze kuche mihnnūwo oshuu ire itso ōr toy.

**Kimiji ōr osiyer otata uje yet shiyokōr mīhnik ich tēr ōr.**

**13** <sup>1</sup> Ich do bese uje tekirihi olakni hn ele ahle ich takaha tekirihi olakpo. Kimiji yeēk tata uje eyok leshtik shiyokōr uje mīhnik ich

ye eraha kimiji ũru, per kimiji ōr osiyer otata o kimiji ōr tre ich bale. <sup>2</sup>Uje yok de olak ahirni ich titim erze uje oshiyokōr uje ich mihñūwo par uje oym oshiyokōr hn titim erze yewo par uje ye oniyokōr erze mihñūwo toy. Ele ahle ich yok de dukuhla per titim ōrpo par uje oym. Uje takaha tekirihi olak nehe kimiji ye onoym ich ye tikintha ōrpe. <sup>3</sup>Olak sehe uhulo tuu imeheeych uje ich ũru uje titim olak Cristo ir ahwoso. Cristo ir ukurbo de par uje nishii olak iluu heke tyenij shuu imeheeych uje ir ukurbo de. <sup>4</sup>Ich ũru uje tooho krus eeychkite shi itso uje ye ukūrbirsh per Porrosht shuu wichi ikpo chīra lakirbo. Ōryok ye ōryok ukūrbirsh. Shi ōryok itso ire uje wapni shiyokōr shi itso uje ye ukūrbirsh, per Porrosht tyenij ishim ōryok ukurbo par uje ōryok pwele oyakashim olak. <sup>5</sup>Uhu olak eyuwo tisir kimiji olak Porrosht aabo pisho o kimiji ye olak ir aabope. Uhu olak eyuwo tisir. Olak uje olak Porrosht aabo ꞥje ye erahalope uje Jesucristo de olak aho? Per kimiji ye olak Porrosht aabope ich Cristo ye chihī olak ahope. <sup>6</sup>Ich tahmūr uje erahalo uje olak Porrosht aabo heke ye timehī pibiyope. <sup>7</sup>Ōryok orar oyapur Porrosht par olak par uje ye ahakōrlo uje ich mihñūwo, per ye par uje ōryok narim oryōkpe. Shi oyahmūr uje ahakōrlo uje ich om. Kimiji oso otata uje oyimehī ich ye latikish. <sup>8</sup>Ye ōryok pwelpe oyiyokōr latik par uje oyontew erze uje ich ũru. Shi oyanimirāha uje ich ũru uje Cristo ishi ōr hñitewihī Porrosht ahir. <sup>9</sup>Uje ahakōrlo uje om ich olak ukurbosh pork olak ewenta erze mihñūwo. Ich uhulo ōryok aylpa pork tokole itso uje ye ōryok ukūrbirsh pork ye nesit oyatsirāha ōryok ahwoso olakpe. Ōryok orar oyapur Porrosht par uje shish ma ahakōrlo uje ich om uje ire sahmūr. <sup>10</sup>Uje ehn yahpaa takaha titir olak ich tichew ana hutita par uje tokosim olak. Heke uje tish olak nehe ich ye nesitpe uje tatsirāha pahwosoho olak. Eyok Irhīch ishim yok pukurbo par uje takashim olak ye par uje tiyokōr mihnikihī olakpe.

<sup>11</sup>Pishibo watsaklo, ich pahwoso uhurc uje tichew tibite ana hutita. Uhu olak ayla. Moymlo uje ahakōrlo uje ich mihñūwo hn ahakōrlo uje ich om. Ahakōrlo uje titim olakike uje de ana hutita ehēt. Shish uhu olak eyuwo ilye hn uhu olak aho kiisihiye. Porrosht sahmūr oso. Wichi uje shuu ōr aho kiis. Wichi uje tyenij takashim olak. <sup>12</sup>Shish tyenij etiloye. <sup>13</sup>Nos wir Porrosht aabo uje ode lika oshim olak saludo. <sup>14</sup>Sehe tuu eyok Irhīch Jesucristo dosir olak. Porrosht ich sahmūr olak, hn ir Ichibich de olak aho hn shish shuu olak eyuwo itsye.